



„Gæca, son boatta balvaiguim, ja juokke çalbme galgga su oaidnet, maidai si gudek læk su çadarettim.“

Nr. 2. 20ad jakkegørdde.

Korsfjordast 30ad januar 1918.

Redaktor: Henr. Olsen.

Dak vuostas 7 çæke ællem gæino alde.

Juokke olmuš algata ællem suddo gæino alde; dastgo dam »vaimo jurda læ baha juo su nuoravuodast«; buokak læ »vašolažak miellalagest baha dagoi siste.« 1 Mos 8, 21; Kol. 12, 1. „Oaže hallo læ vašalašvuotta Ibmel vuostai, dastgo dat i læk Ibmel laki vuollasaš, ige dat sate dam.« Rom. 8, 7.

Dat gutte læ bissovaš vagjolet suddo gæino alde, satta gavdnat, atte dat doalvvo lappujubmai ja dam agalaš jabmeini. Jos olmuš datto vælftat dam hirmos dæivvamest, fertte son jorggalet ja duolbmat dam gæino, mi laidde çækkemættom likko-audogasvutti ja agalaš ællemi Ibmel rikast.

Dat nubbastus, mi fertte šaddat singuim, gudek dattuk boattet Ibmel rika sisa, læ jorggalus ja ođđasistriegadæbme. Mat. 18, 3; Joh. 3, 3. Namatus »jorggalus« laidde jurddaga dokko dam mærradussi, mi valddujuvvu Vuoiņa çuvvgitusa vuolde atte jorggalet ječas erit suddo ja gažžarvuoda gæinost vagjolam diti ællem daihe audogasvuoda gæino mielde.

Namatusa bokte »ođđasistriegadus« boatta olmuš jurdašet dam nubbastusa ala, mi daptuvva su vaimost, gutte læ mærradam jorggalet ječas erit suddo gæinost. Dat nubbastus vaimost šadda dam Bassevuoiņa ođasmatte duoje vuolde. Dat persovna, gutte ođđasistriegaduvvu, boatta dam nubbastussi çadaçajetuvvut. Vaimo nubbastus i sate olatuvvut dagoi bokte, mutto boatta dam gattavaš suddolažži osko bokte evangelium loppadusai ala sud-

doi andagassi addujume birra — buok duššefal arnost. Rom. 3, 24—26; Es. 2, 4—9.

Dak moaddelagaš çækek, mak berrijek valddujuvvut boatem diti ællem gæino ala, læ çuovvovažak:

1. Bagjeliçajetæbme suddo birra.

Dat gaskaoabme, maid Ibmel Vuoiņa adna suddo bagjeliçajetusa birra, læ lakka. »Gutte dakka suddo, son daggobokte bagjelduolbma laga, ja suddo læ laga rikkujubme.« 1 Joh. 3, 4. »Mon im dovdam suddo alma go laga bokte; dastgo mon im læm dovdat anestunid, jos laka i lifi çækkam: Don ik galga anestuvvat.« Rom. 7, 7. Dat laka mi çækkka: »don ik galga anestuvvat«, læ dak loge bakkoma; nabbo dalle šaddek dak loge bakkoma, mak bagjeliçajetek daihe çadaduodæstek suddo birra.

I oktage galga jurdašet atte son læ suddotaga; dastgo buokak læ suddodam. Rom. 3, 23. Damditi darbašek buokak jorggalusa — ođđasistriegadæme. Dat i læk gal nokka atte dušše mieltat atte olmuš læ suddogas, ige dovdaskætta laittet ječas suddodile bagjel. Dat læ ja b m e m bagjelduolbmam ja suddo siste. Efes. 2, 1. Suddo i læk šaddam ælle duottavuotta sudnji.

Mutto go dat Bassevuoiņa oažžo lobe bagjeliçajetet suddo — vaimo bahas ja billeduvvum dile birra (Joh. 16, 8), de æ l a s k a suddo, ja dalle boatta s u d d o g a s oaidnet dam buok dam fastevuodast ja savvat ječas friadakkujuvvut dast.

2. Moraštæbme

Ibmel maņņai boatta æska, go suddo ælaska. Jos dat moraštæbme galgga sattet dugjot duotta jorggalusa, fertte dat læt nuft stuores, nuft çiegnal, atte

vaibmo šadda aibas çuokkijuvvut ja vuollanet Ibmel ouddi, atte suddogas læ mielast dakkat maidikkenassi eritbæssat suddo valdest.

»Moraš Ibmel maņņai dugjo jorggalusa bestujubmai, mi i gattujuvvu.« 2 Kor. 7, 9.

3. Suddodovdastus

Çuovvo duotta moraštæme mielde Ibmel maņņai. »Mon dovdastim mu suddom dudnji ja im çiekkam mu værredago. Mon çelkim: Mon aigom dovdastet mu bagjelduolbmamidam Hærrai. Don andagassi addik munji mu suddovæge.« Ps. 32, 5.

»Dat gutte çiekkka su bagjelduolbmamides, i galga suittet likko; mutto dat gutte dovdasta daid ja ærota ječas daina, galgga oažžot vaibmoladesvuoda.« Sadnel. 28, 13.

Dat gutte læ suddodam su mieldeguoimes vuostai, galgga dovdastet dai suddoid sudnji. »Dovdastepet rikkomid gutteg guimidasadek.« Jak. 5, 16. Luk. 17, 4.

Mutto mi mærkæšep: I oktage galga damditi oskot nuft atte suddodovdastus olbmui oudæst doalvvo bestujubmai sielo ašest; daðebahabut gavdujek ædnagak gudek çagjadadek dast hirbmoset. Gaskotaga berre muitotuvvut: »Ibmel arbmo læ almostuvvum bestujubmen buok olbmuidi.« Tit. 2, 11.

4. Osko.

Boatem diti suddoi andagassi addujume æigadussi galgga olmuš oskot Ibmel loppadusaidi suddoi andagassi addujume birra.

»Jos mi dovdastep min suddoid, læ son oskaldas ja vanhurskes, atte son andagassi adda suddoid ja buttesta min erit buok vanhurskesmættomvu-

đast.« Olmuš i galga æppedet Ibmel loppadusai ala suddoi andagassi addujume harrai.

»Imgo mon cækkam dudnji atte jos don matašik oskot, de oainašik don Ibmel hærvasvuoda.«

5. Suddo andagassiaddujubme ja suddo vajaldattujubme.

Sæmma cælbmeravkkalæmest go mi dovdastep min suddoid ja oskop Ibmel loppadusaidi, andagassiaddujuvvu suddo. Ja sæmma boddost suppe Ibmel suddoid vajaldattujume appai ja ige buvte dai æmbo muittoi. Mika 7, 18—19; Jer. 31, 33—34. Dai suddoi birra, maid Ibmel andagassiadda, i muitot son šat. Dai suddoid, mai harrai Ibmel muitota olbmui, læ dak, maina son i læk jorggalusa dakkam. Satan muitota gal suddoi birra, maid Ibmel læ andagassiaddam ja vajaldattam; mutto olmuš i galga diktet ječas vuorjatuuvut daina.

Gitos lekus Ibmeli, atte son vajaldatta buok suddo, maid son andagassiadda!

6. „Ale suddod æmbo.“

Jorggalusa bokte cælla Ibmel su lagas vaibmoi Bassevuoiņa bokte. Jer. 31, 33—34; 2 Kor. 3, 3. Æska dalle oažžo olmuš halo Ibmel laki siskaldas olbmui mielde. Rom. 7, 22. Ja æska dalle satta olmuš cækket: »Dat læ rakisvuotta Ibmeli, atte mi doallap su goččomid, ja dak æi læk lossadak.« 1 Joh. 5, 3.

Dam gađaidægje nissoni celki Jesus: »Vuolge erit, ja ale suddod æmbo.« Joh. 8, 11.

Dai duottavuodast ođđasistriegadegji ja bassendakkujuvvumi birra læ Jesus cækkam: »Dast læk si guđek dollek Ibmel goččomid ja Jesus osko.« Alm. 14, 12. Paulusiu sattek si cækket: »Mon voejam buok Kristus siste, gutte dakka mu gievrnan.« Filip. 4, 13.

7. Dat ođđa ællem.

Duotta jorggalus nieldesbukta cælle nubbastusa. »Jos guttege læ Kristus siste, de læ son ođđa sivdnadus, dat boares læ yassam, gæča, buok læ šaddam ođasen.« 2 Kor. 5, 17. Dat læ Vuoiņa ođđasistriegadatte duogje jorggalusa bokte. Dam baha maid suddogas ouddal rakisti, vašota son dal, ja dam buore, maid son vašoti,

rakista son dal. Son læ šaddam ođđa sivdnadus — ođđa olmuš. Son læ dal duolnastam ællem gæino ala.

I oktage olmuš dokke Ibmel rika sisa boattet ouddalگو son læ cædamannam daggar nubbastusa, ja i oktage sate cædamannat daggar dovdujume alma mærkaskeatta.

Rakis lokke, jos don savak boattet Ibmel rika sisa, de ale vajaldatte atte dat aidno gæidno dokko læ ođđasistriegadæme ja ællem gæidno!

Jurddagak ovta

sardneolbmast.

— Loga evangeliumid, jos don aigok oappat dovdat Jesusa.

— Jesus i hænggam aivefal su rumašdæddoin ruosa alde, mutto mu suddodæddoin æmbo.

— Bestujubme ollašuvvui euddalگو mi riegadeimek. Mi æp sate bigjat guokte sagge ruossot asatam diti dam.

— Golgata alde almostuvvui Ibmel vanhurskesvuotta ja rakisvuotta.

— Ibmel likoi dudnji nuft burist ja bijai daggar mavso du ala, atte son addi Jesus dudnji.

— Jesus læ dat aidno suotas mi bista, ja Jesusin læ mist albme.

Dam oskolaža davverak.

Okta nuorttaædnamlas oaiivamuš vuostaivaldi muttom in sadaga dam spanskalaš gonagasast. Dat læi aido dastamanņel گو spanialažak legje gavdnam Amerika rigges goll- ja silbbagruvaid.

Oaiivamuš cæjete olmai vuodain saddagi su stuora goaffares, man siste son vurkodi ječas gollid ja mavsolas davverid. Saddagolmai naketi giedas bodnai gollehivvodaga sisa ja moivvi dassago gietta oli goaffarbodnai. De celki son skuččededin:

„Mon ollim bodnai du davverin; mutto mu gonagasa riggodagain i gavdnu loappa.“

Mi oaidnep man farga dak stuoremus ædnamlas riggodagak nokkek. Mutto Ibmela manak cæigaduššek nokkamættom davverid; dastgo dak læ agalažak.

Osko Ibmeli!

Ibmel i divte goassege atte dat baha galgga rievedet ovtage su manain. Mi orro givsedæbme,

dat boatta ouddanidetet stuoreb buore. Son i valde maidege erit, mudoigo son adda fast ollo buoreb dam sagjai

Juokkehas gutte osko, i æped Ibmel dato ja navcai harrai atte addet migjidi dam buoremusa ja dakkat min oudast dam mi vuoggad læ. Dat gutte duottavuodast dovdda su, læ gærgos balo ja moraslas lossa ja avketes nodin.

Min manak.

Muttom rigges allanalag nisson dam boares Romast cæjete su cæiņaides nubbai.

„Oažomgo mon oaidnet maidai duge cæiņaid?“ jærrali dasto nisson nubbest.

Duot manai olguš ja viežai su cæieča manas sisa. „Da læ mu cæiņak,“ celki son. —

Lægo dust vela finasebbo ja mavsolebbo cæiņak, don ačče ja ædne? Mutto dalle dat læ gaibbedatte atte gattit dai cæiņaid ja bærralid, atte don ik masse daid. Daihe ain værrab: atte Ibmel i masse daid. Dak æi læk aive du, mutto su.

Go jabmemdibmo ravkka du erit, ja don ærranak du davverin — du manain, gosa galggek si boattet? Jos don ælak Ibmelin, de satak laiddet du manaidadge sudnji, atte sige gavdnek bestujume sin sillosek.

Damditi, vigga vuottet manaidad Ibmeli ja albmai, don oskolaš ačče ja ædne! Dak læ ila divrasak šaddat gadotusa oabmen.

Bævtalaš sanek.

Dast gost læ ollo ruossa, læ maidai ollo cæuogga. Dast gost læ ollo gæčcalubme, læ maidai ollo rokkus.

*

„Mon aigošim addet obba mailme,“ celki muttom rigges olmai ovta oskolaš nissoni, „æigaduššam diti du duotta dovdo.“

„Dat læi aido dam hadde dat mavsi munji,“ vastedi nubbe. „Mon læm oaffaruššam mailme vuoittem diti Kristusa.“

*

Kristus valdda sæçagasa erit jabmemest, mutto son i valde mirko erit suddost.

*

I oktage sate varjalet su vaimos buttesen, gutte i loga bibales; dastgo mi spægjal læ muttui, læ Ibmel sadne silloi.

*

Dam ovta bæelde læ Jesus ja albmē valljit. Dam nubbe bæelde bærgalak ja helvet. Maid valljik don?

*

Mon dovdam ovta gutte çokka Ibmel olgiš bæelde, gutte læ gievrra buok mu vašalažai vuostai, buok mu likkotesvuodast, ja gutte suogjalasta mu — dat læ Jesus.

*

Mu doaivvo vuoinada 3 dinga alde:

Dam rakisvuoda ala, mi læ oamastam mu mannan.

Dam osko ala, mi læ loppe-dam munji arbe.

Dam famo ala, mi vægja ad-det munji sœmma.

*

Okta našona buoremus væketegin læ dat ædne, gutte oapata su manaides rokkadallat. I ovtage olbmast læmaš mikkege jabmem-sængast cœlkket dam vuostai atte su ædne læi kristalaš.

*

Dat gutte jotta erit Ibmlest, fertte ješ makset matkeolgušgoid.

*

Dušše dat læ gievrra Ibmel dato siste gutte læ russinavllim ečas dato.

*

Dat aigge maid mi golatep avketæbmen, læ dat goas mi gillap dai stuoremus tapaid.

*

Atte ællet nuftgo kristalaš satta oppjuvvut sodnabæive; mutto dat olgušæletuvvu arggabeivid. Goallo satta cakketuvvu çoaggalmasain, mutto çuovgga barggosajest daihe siljo alde. Kristalašvuotta occa su biebmos rokkuslanjast.

*

Dat stuoremus likko læ atte læt Ibmel manna. — Læggo don?

Bræva Mefjordast.

Dal mon halidam obba vaimostam çallet min rakis »Nuorttanastai«, ja mon doaivom oažžot saje mu hæjos çallagi. Daina çalabittain nævom mon buok vieljaid ja oabaid rokkadallat Jesus nammi Ibmlest Bassevuoina væke, vai son çuvggeši din moft di galggabetet rokkadallat. Mutto lokket vuost Matt. 6, 5—15.

Must lifēi æmbo çallet, mutto uccan læ sagje min blaðest. Savam atte mi buokak logašeinek Matt. 24, 29—36.

Per Larsen Somby.

Vastadusak P. A. bittai.

Oktovuodast çokkadedin gukkes, lossis jurddagi siste ovta ækked, girjigum ja avisaigum birastattjuvvum, aicam mon »Nuorttanaste«st ovta bitta, man bajeldes çala læi: »Samenuorak, morraneket ja fuobmæjeket aigadek.« Mon çokkanim angervuodain çadalokkat bitta, man sistdoalo must boði halo vastedet.

Dat olmai çalla bajasçuvvgitusa, skuvlai ja min aige ællem birra. Son sivatalla samenuoraid; go skuvlaidi æi mana, ja dieðeta sigjidi daggar duomo atte sist læ stuora logodakkam manemuš bæive dam diti. Vuoi don uccan jurdašægje olmai! Æigo du jurddagak lækge ollam gukkelidi dallego çallik dam bitta? Skuvlak læ buore ješaldes aigalaža dafhost — dat læ duotta. Dat gutte skuvla læ vazzam, matta buorebut birgget munga dafhost go dat gutte i maidege læk oappam.

Mutto de boatta oaivvegaçaldak: Galle læ dak samenuora, gæk sattek jeçaidæsek koastedet daggaræš oapoidi, maina sattek jeçaidæsek æletet ja avke barggat sin lagamužaidasasek? Ænaš oasse læ dak samenuorak, guðek æi bæsa gukkelidi go amtaskuvli. Na, gukkašgo jovddek daina oappobittain? Si bottek aido bahamus mæddoi. Si ožžuk vebaš muosatet mailme oapo jukkamušast — ja de aibašigottek æmbo manjai. Dat šadda dego garra davddan. Nubbe guvllui gaikko varetovuotta, ja nubbe guvllui fast garra aibašæbme. Æi si lusted æmbo maidege hommat. Dak duonak billašuvvek — daidi šadda buok vaivve ja lossad.

Dasto rakada amtaskuvla ja munga daggar skuvla samenuorain šlarva. Si æi æmbo storra dam barggoi mannat, maid si ouddal læ barggam. Æi si mate hallat ja vazzet rivtes lakai — ja æige sagga æmbo dovda sin olbmuidæsek. Æi si læk hærrak æige nærrak. Joavddelasvuodast smittek munga bahavuoda. Moft sattek daggarak avke barggat sin biras olbmuidasasek? Çævllai vuotta læ nuft stuores sin lutte, atte si gaddek jeçasek mattet buok.

Igo læk nuft mannam ænaš sami nuoraigum? Gæid mi galggap dalle sivatallat — boarrasid vai skuvlaid? Aa, dat læ vaddes gaçaldak.

Davja læ maidai dak sœmma skuvlak dušše vahagen ædnag vigites samenuoraidi. Skuvlaidi çoagganak mangalaganak. Dam amtaskuvla vazzem-mokkest oppek munga nuora ganda spēllat, vidneboattal ceggotaddat ja ain æra bahavuoda. Gæça dal don, P. A.!

Dasto boatta vela dat: I galgaši læt dat nuft gæpas sivatallat sami boarrasid, go olmuš jurdaš dam aigalaš dile harrai. Æi ænaš samevanhemak ligod saddet manaidæsek oapoidi, go ællamušlaibe diti læ nuft stuora soatte — ija-bæive ferttijek læt joðost, jos galggek bæive bagjel birgget. Jurddel dam don, P. A.!

Mutto de boatta dat vigtigemus oasse. Son sægota vuoinalaš æše mailme oapoidi. Vuoi don sevnujam ja çagjadaddam siello! Ikgo don dieðege gost olmuš oažžo dam vuostamuš »vuoina gasta«? Goas bocidek dak hærvæš liedekek nuora olbmui silloi? Dat dapaťuvva dallego olmuš morrana suddo nakkarest ja osko suddoides andagassi — dalle dat gastašuvvu olmuš »Bassevuoina gasta«; dalle dat bocidek hærvæš liedekek, ja runidek ja guðdek daggar šaddoid, mak çajetuvvujek olbmui ællemest.

I mailme oappo doalvo gošsege olbmui vuoinalaš matke ala — dat adda dušše æmbo visesvuoda, dam mailme çiegosvuoda ja jottem birra.

Jurdaš dal dam ala, don jiermalaš çalle! Ale divte silod çalmid sevnujedet aibas. Gæças bajasguvllui ouddalgo manjed šaddal!

Okta ællem guoratalle.

* * *

„Samenuorak, morraneket ja fuobmajeket aigadek!“

Dam lagaš nuft bagjelistnamatuvvum bitta lokkim mon »Nuorttanaste« alde, maid okta P. A.-nammasaš olmai læi čallam samenuoraidi cuigotussan ja ravvagen, vai si fuobmašifče aigesek, amas boattet gattat ja garotet sin ječaidesek jallavuoda ja dai beivid, maid si læk ællam dabe dam mailmest.

Dat læ gal buorre atte olmuš ravve ja cuigod guimides, ja erinoamačēt nuorakažaid, atte dak morranifče suddo nakkarin ja bajasčuožželifče æppeosko čappis havdest ja ocašegje ælle ja bättevaš čuovga sin sillosæsek osko bokte Hærramek Jesus ala. Dastgo čallujuvvum čuožžo: »Morran bajas don gutte oadak ja čuožžel bajas jabmi lutte, ja Kristus galgga du čuvvgit.«

Mutto, rakis P. A., i dam lakai moft don du bitta alde čujotak atte olmuš galgga occat ælle bajasčuvvgitusa, ja atte si dalle æska læ morranam, go læ alggam vagzet daina mailmalaš skuvlain. Gal skuvlak læ gal buore, dam im aigo mon biettalet, buore aigalassi; mutto ænaš oasse daina skuvlain balam mon sattek læt vahagen vuoinalaš ašidi, dastgo mailmalaš oappo datto davja havkkadet dam oelle dovdo olbmui vaimost. Dat læ davja oidnum, atte erinoamačēt nuorai gaskast læ šaddam loikas kristalašvuoda ašše, go si læk alggam luottet sin ječasek jierme ja visesvuoda ala, ja maņemusta læ sin biebmo šaddam Ibmel manaid vigeke ja fæilak, go si duonak æi oaine šat ječaidesek vigid ja fæilaid, mak læ čikkujuvvum olmušlaš visesvuoda čappis balva duokkai.

Mon dieđam vissa atte ænaš oasse nuorain dast Dænost læ oamastam aldsesæsek visesvuoda ja ællem, mi læ dakkujuvvum olmušlaš jierme ja mailmalaš skuvlai bokte. Mutto Ibmel guvllui: goas læ si oskom dam rakis Hærra Jesus ala ja oamastam aldsesæsek su lonestægjen ja bæsten.

Sivatalak vela, rakis P. A., Tana vuorrasid, go si æi avčot ja luoite manaidesek skuvlaidi, atte sist læ ain dat boares vikke ja boares osko. Mutto mon dieđam vissaset, atte dain vuorrasin læ oaidno gukkelidi go mist nuorarieboin, oaidne dasa, man vikkes ja famolaš aigevuoigja læ dal.

Dat čappis mailme vuoina ditto gæset ovta nubbe maņest dai nuorakažaid suddo ja æppeosko čappis havdidi, manditi dak Larves kristalaš vuorrasak šaddek nuft ollo morraša gillat, atte davja si æi væje ovtage sane bakkodet, æi ærago oktavuodast Hærrai čuorvvot šuokkemim ja rokka-dallamin sust varjalusa sin nuorakažai harrai.

Nuft dal rakis nuorakažak, di harves oskolažak, allet divte ječaidædek fillijuvvut mangalagan oapoin, mutto giddadollet čavvgadet osko giedain dast mast di lepet ællem ja hæga ožžom, namalassi Hærra Jesusest, dastgo aive sust læ ællem ja bajasčuvvgitus.

r.

*

Go mi læp sisavalddam dam vuostas eisasaddijægje (P. A.) bitta, de læp mi gavnatam rievamussan atte dakkat dam sëmna vastadusbittaiguimege dasa. Mutto dađemielde oainetep mi maidai aše gørgosen blædest.

Red.

Dam vides mailmest.

Odda skuovvasortta.

Dal læ fabrikerijuvvumen min ædnamest odđa skuovvasortta, mi namatuvvu »albmug-skuovvan«. Dak æi šadda čabba, mutto gærddel. Hadde galgga læt 28—30 kruvna olmaiskuoivain ja 23 kruvna nissonskuovain barast. 75,000 bara læ dat vuostas hivvodak, mi gavppai boatta.

40,000 olbmui bargotaga

galggek læt dal min ædnamest. (?)

Tromsa amta

suitta 10,000 sæka jafoid ja miljonbæle kilo sokkar.

Balkka stuoradiggeolbmaidi.

Præsident Mowinkel ja 5 stuoradiggeolbma datotek læstuvvut balkaid stuoradiggeolbmaidi jogo 5500—6000 daihe 4500—5000 kruvni juokke oktičogganamaigga (session).

Dal læ stuoradiggeolbmai balkka nuftgo dittjuvvu 3000 kruvna ja 1500 kruvna divrasaige-lasatus dam jage sessioni.

Garra buollašak.

Garras læ buollašak dam dalve juokke guovlost. Kristianiast legje gasko dam mano 26 grada, Kongebergast 46.

Mutto i dat garra, gaske buo'as læk sæstam minge, sameædnamlazašid. Dabe Fielvuonast læi ovta bæive 27 grada — dat stuoremus temperatur manga jakkai. Gal dat juo baljo c.v-coige beljid ja gaskaši njunid olmusrieboin. Ja rustasuovva čuožoi vuodnaraige olgus dego sukkis lievdde.

Čaccesullust læ sëmna aige 30 grada, Girkkonjargast 44, Buolmagest 46; mutto Garašjokka dagai rekorda — dobbe legje 52 grada.

Nuft bagjen duoddarest læ aibmo goikkasebbo ja gæppasebbo, ja buolaš dađemielde i nuft birggedmættos.

Muttom darogiel blađde muittala, atte Lulle-Ruotarikast læmaš buolaš dast dam manost gidda — 63 grada ragjai. Dat gullujuvvu ila bævtelen, ja mi doavvop lagamusat dat læ prentimfæila tala dađhost.

Garradalkke ja likkotesvuodak.

Riepvuonast læ 3 stuora skipa ja 1 nuottesõita vugjum. 6—8 olbma balatuvvujek hævvanam.

Hirmos garra orkanlagan dalkek læ dast gieskad hærijedam dabelakkasin, ja nuft bistevas oktanhavest garasvuodast atte dat i muittujuvvu.

Garradalkke læ dađabahabut gaibbedam oaffarid ja dakkam stuora vahagid. Nuft læ Riepvuonast 3 skipa (skonnert) vugjum dalke vuolde, »Hindenburg« Bergsfjorast, »Sjøormen« ja »Veslemøy« Tromsast. Maņemusnamatuvvum skipa mandskapa, 6—8 olbma, balatuvvujek maidai duššam, go dam ragjai æi læk oaidnam æige gullam maidege sigjidi.

Ovta Rairo nuottesõitain læ dalkke duššadam oktan vadnasiguim. Dasa vela læ 2 nuottesærvaga massam 4 nuote oktan salledfidnegin. Nuottevahag læ arvo mielde 50,000 ja salledfidneg-vahag 60,000 kruvna ouddi.

Jottelesruvtadamma »Kong Halfdan« læ mannam coakkas ala davabælde Tromsa. Buok galvvo ja poasta galgga læt duššam.

50 olbmui

læ Frankrikast gollum jamas buollaša bokte.

10,000 olggoædnamlaza

legje mannam jage dittuiaddam sin boattema Kristianiast — dat stuoremus jakkasaš lokko dam ragjai.

Bivvales dakke læ mist

dal fast. 3 grada liegas læi olggon dast ovta bæive.

Prenttejuvvum »Nuorttanaste« prentimrakkanusast, Korffjord'ast.